

Despues di varios intento, a tene e di dos groundbreaking pa e proyecto

Energia produci pa Solar Car Park lo beneficia Aruba completo

ORANJESTAD – Manera BON DIA ARUBA a raporta ayera den un forma limita, e di dos groundbreaking pa e proyecto Solar na aeropuerto riba parkeerplaats di Aeropuerto Internacional Reina Beatrix a tuma luga. E di dos, ya cu aña pasa tabatin uno caba cu sin embargo no a sigui. Den esun aki, Gobierno di pais Aruba, hunto cu Utilities NV, como tambe Elmar, WEB y Triple A nv, a duna inicio na e Proyecto combina cu sector priva, encuanto e parke cu ta bay genera energia por medio di rayonnan solar.

FUTURO

Minister di Energia Mike de Meza a cuminsa na bisa cu esaki ta e direccion pa futuro ta e tipo di "Solar Car Park" di energia na aeropuerto. Pfixx Sol ta e compania cu ta bay construi e proyecto aki. E dia aki ta pa pone e prome piedra pa e parke di energia solar. E ta cuadra den e polisa di energia di Aruba, cu ta pa bira poco poco menos dependiente di energia fossil. Ta importante pa remarca cu e cooperacion di aeropuerto ta importante pa e proyecto aki por a tuma luga.

CAMBIO

Ya caba companianan di utilidad ta haciendo un trabou riba e proceso aki. WEB a cuminsa cambia di e sistemanan anticua cu ta menos eficiente, pa bay den direccion di tecno-

logia nan hopi mas eficiente. A traha riba motor recip cu tin rendimiento sumamente mas halto, cu ta haci cu Aruba ta menos dependiente di energia fossil. Tambe WEB ta trahando riba proyectonan sumamente importante cu un vision bunita den e direccion aki. Awe cu ta inaugura e proyecto aki, ta dal un paso den e bon direccion. De Meza a bisa cu e parke di energia aki ta duna promocion di e maneho cu tin na pais Aruba. Turistanan ta mira e cambio y e intencion di Aruba pa promove energia duradero. E proyectonan aki ta yuda Aruba ta bira mas sostenibel localmente y menos dependiente di otro paisnan.

MINISTER DI TURISMO

Aworaki no solamente ta papia di molinanan di biento, pero awor Aruba ta bay crea un forma nobo pa crea y produci energia na pais Aruba. E proyecto aki ta duna Aruba den su totalidad un paso mas dilanti di e competencianan. E ta bira un fuente di mercadeo nobo pa aeropuerto y tambe pais Aruba. E proyecto aki ta bay genera den su piek, loke aeropuerto ta consumi riba un dia diario, di casi 3 megawatt, esaki ta pone cu Aruba por ta orguyoso, cu Aruba ta bira un ehempel cu ta bira den cierto sentido pa e region aki. E ta produci practicamente 100 porshento di e energia cu e ta consumi. E energia aki no ta bay completamente pa aereo-

puerto, pero ta keda suministra pa otro areanan den e region.

ELMAR

Director di Elmar Robert Henriquez a indica cu e momento aki ta grandi pa Aruba completo. E motibo cu a scoge e fecha di dialuna pasobra tabata earth day. E esfuersonan di uza energia berde ta pa conserva mundo. E esfuersonan aki ta pa keda uza riba un termino largo Aruba ta dunando un indicacion cu ta kere den e direccion aki cu ta sostenibel y ta duna e pais y e futuro generacion un beneficio a futuro. esaki ta haci cu energia ta keda pagabel. Elmar a bisa cu nan kier contribui na e proceso aki y ta kere cu ta importante pa sigui cu e proceso aki den futuro.

AEROPUERTO

Director di Aeropuerto a indica cu e proyecto aki ta un cambio grandi pa nan maneho. Aeropuerto a indica cu nan ta di acuerdo pa yuda den e proceso. Durante añanan aeropuerto a bisa cu nan kier un impacto minimo riba medio ambiente. Esaki ta un ehempel bon pa uza energia duradero y energia fossil na mes momento. Esaki ta un bon forma pa demostra Aruba, demostra aeropuerto y tambe energia duradero. Aeropuerto a haci su parti chikito den e proceso aki. E trabou di construccion ta bay tin su impacto riba e



parkeerplaats di aeropuerto, pero e compania di construccion ta percura pa e trabounan cana na e forma corecto.

PFIXX SOLAR COMPANY

E proyecto aki ta uno cu ta bay tin 14 model di panel solar cada panel tin n produccion di 250 kilowatt. Esey ta nifica cu ta bay tin 24 mil meter cuadra di garage di 3 meter 20, cu panel solar. Esaki ta nifica un produccion di

coriente cu por suministra alrededor di 2000 pa 2500 cas cu un proyecto asina aki. e proyecto aki tin un duracion di alrededor di 12 pa 14 siman. Tur cos ta depende di e tereno y tambe e evaluacion cu ta bay keda hinca den otro. Loke cu ta importante ta e seguridad y p'esey ta trahando riba tur aspecto pa por implementa e proyecto.

INICIO DI E PROYECTO

Mester bisa cu e bid inicial pa a Solar Park na airport a cuminsa for di November 2011. Un cantidad di 27 compania local y internacional a inscribi pa cumpra e bid. For di e 27 companianan na final a keda solamente 4 compania. Na inicio e grupo Oskomera di Hulanda a gana e bid, te cu nan a haci un groundbreaking na September aña pasa. Pero parce cu e prijs cu nan bid tawata mucho abou pa di cual economicamente nan plan no tawata factibel. Esaki a pone cu nan financiamiento bou di guia di Rene Kan a hala atras na ultimo ora, y e grupo di Fito y Rudy Croes tambe a cay afo. E grupo di Terence Lacle cu riba papel tawata esun mas experencia, no a keda cla cu e garantia na tempo y como tal tambe a cay afo. Y esey a pone cu finalmente e Grupo Pfixx di Milton Harms a gana e bid. □